

Jerebu diramal beberapa hari

INFO

Indeks IPU di beberapa kawasan seluruh negara semalam

Kawasan	IPU	
	11.00 pagi	5.00 petang
Johor Baharu, Johor	57	58
Alor Setar, Kedah	59	56
Pengkalan Chepa, Kelantan	54	54
Bandaraya, Melaka	51	51
Bukit Rambai, Melaka	54	55
Seremban, Negeri Sembilan	54	53
Balok Baru, Kuantan	62	62
S K Jalan Pegoh, Ipoh Perak	59	62
Tanjung Malim, Perak	60	110
Kangar, Perlis	52	49
Seberang Jaya 2, Perai	72	69
Kota Kinabalu, Sabah	37	40
Kuching, Sarawak	41	43
Shah Alam, Selangor	62	64
Kuala Selangor, Selangor	70	70
Pelabuhan Kelang, Selangor	76	76
Kuala Terengganu, Terengganu	58	59
Putrajaya	54	55
Labuan	40	42
Kuala Lumpur	60	63

Nota:

1-50 - baik, 51-100 - sederhana, 101-200 - tidak sihat, 201-300 - sangat tidak sihat, 301-500 - berbahaya, >500 - darurat/kecemasan

KUALA LUMPUR: Keadaan berjerebu di beberapa kawasan di negara ini dijangka berterusan untuk beberapa hari lagi dengan Tanjung Malim, Perak, mencatatkan kualiti udara tidak sihat sehingga jam 5 petang semalam.

Kawasan Tanjung Malim yang hanya mencatatkan bacaan Indeks Pencemar Udara (IPU), 60, iaitu pada paras sederhana di sebelah pagi, bagaimanapun, menunjukkan penurunan kualiti udara apabila merekodkan indeks 110 pada jam 5 petang.

Pelabuhan Klang yang mencatatkan 104 tidak dikategorikan sebagai tidak sihat pada Sabtu lalu pula semakin baik apabila hanya mencatatkan bacaan sekitar 76.

Sejumlah 31 kawasan mencatatkan kualiti udara sederhana, manakala 19 lagi pada tahap baik.

Semalam, titik panas yang mewakili kawasan kebakaran dikesan semakin berkurangan di Sumatera daripada 185 kelmarin kepada 145.

Bagaimanapun, jumlah titik panas di Borneo mencatat peningkatan mendadak daripada 22 kelmarin kepada 83.

Jarak penglihatan di kebanyakan kawasan turut merosot dengan mencatatkan bawah 10 kilometer (km) dengan Prai dan Butterworth, Pulau Pinang, mencatatkan jarak penglihatan 6 km sehingga jam enam petang semalam.

Selain kebakaran terbuka di negara jiran, kebakaran 40 hektar kawasan lapang bertanah gambut di Sepang sejak minggu lalu menyumbang kepada keadaan berjerebu di negara ini.

Sementara itu, Jabatan Meteorologi semalam mengeluarkan amaran mengenai keadaan jerebu di utara Selat Melaka yang menjejaskan penglihatan di bawah lima km dan berbahaya kepada kapal yang tidak mempunyai peralatan navigasi.

Jabatan itu berkata, keadaan itu dijangka berterusan sehingga lusa dan mengeluarkan amaran angin kencang dari arah barat daya dengan kelajuan antara 40 dan 50 kilometer sejam perairan Condore dan Terumbu Layang-Layang yang akan mengakibatkan laut bergelora dan berbahaya kepada bot kecil serta sukan laut.